

## Takurda-o Burus o wu gene yan-dor Yeso n-me bo-o o-Korosiya

Rem-se ro n-me à:

M-zante 1:1-8

Nom-mo Shir un senge-m Kiristi ne 1:9—2:19

Hoog-m pu-mo n-me un Kiristi 2:20—4:6

Ur-kom 4:7-18

<sup>1</sup> Me Burus, me genbe ka takurda-o. Me wan-Tom Yeso Kiristi wu,\* remen Shir daagu me un waragte ko-yan-Tom Yeso. Me kane un or na ne Timoti ko-yan-dor.

<sup>2</sup> Me no m-tombe un ka takurda-o, no hun-ne ye Shir un Kiristi ne. Komo or te ne yan-dor un bo-o o-Korosiya. Shir mustu no ba m-kukop, komo no ro yan-ess ut-ma ye be-de un wu. Um konog unze Shir o-Tato na wu sengu no m-gu, wu 'ye no m-yar un gwugwu-mo ur-hur ne.

### Ur-bongon us-kon ne

<sup>3</sup> Ko o ke da-o te us-kon rem no, te un bom un Shir rem no. Te us-kon be-de Shir wu ro Tato-o Wan-Koyan na Yeso Kiristi à. <sup>4</sup> Te bomog Shir rem no remen te hogute ma-to un sher-m no be-ur Yeso Kiristi, komo no m-was un kap hun-ne ye Shir ne. <sup>5</sup> M-sher m-was ne mo ro m-rwunte dish-o un rii-yo o-kwum yo Shir he no m-bopse yo wu essu no ree n-Ton shir à. No hogusute cin n-ga ne rem-se ur-bon se Shir swore o-nu wua nomo no à. No hogusute ka rem-se da-o hun-ne habe ye ruru no Ma-to m-Rerem ma-to o-nip mosse un Kiristi ne à. <sup>6</sup> Ko kene hun-ne ut-moor

---

\* B̄or-o gaan:1 1:1 Wu Shir daagne à.

ne ro m-hoge un ka Ma-to m-Rerem to, komo hun-ne ut-moor ne ro m-warag un yan-dor. Komo ye ro m-nom un rii-yo Shir hette o-zak à. Yo ka yo un kor hond hond bo nome be un no da-o no hoge ka ma-to ur-takan à. Komo no nak o-nip un yar-mo Shir ne, unze Shir ro m-soks un ba'as-to un ye shere be-ur Kiristi à. <sup>7</sup> Epararas wu yoosu no ka ma-to. Wu ro m-nome un Kiristi m-guw, komo te wu m-con. Wu nomote Wan-Koyan m-guw un ess ut-ma. Un suge un te, wu nomte kaane.<sup>†</sup> <sup>8</sup> Wu wu komo ruru te bo Kukt-o Shir ya'u no m-was un kap hun-ne ye Shir ne à.

<sup>9</sup> Remen kaane cin ho-de te hoge ma-ut no to ur-bon à, te yage us-kon rem no á. Ko o ke da-o te us-kon unze Shir kutu no myet rii-yo wu cone no nom à. Te un kon-se Shir wu 'ye no us-weer us- nap ne se un Kukt-o Shir. <sup>10</sup> Te un kon-se Shir unze no she'et, bo depe ka ye dore Wan-Koyan ye she'et à. Komo no senge wu un gwu'urse ur-hur un nom un rii-yo ur-bon ne. Te us-kon komo bo no he m-ma'as un nom un bo un rii-yo ur-bon koyanda à, no nep Shir ur-bon ne. <sup>11</sup> Te komo us-kon be-de Shir wu tor kukt-o no wu 'ye no m-'wons, be-de un do ye un no beeb-de un wu de rotte ur-me'et á. Te us-kon Shir kaane remen no hokste m-joose o-zak m-gaag ut-men ne be-de un swo ur-koob. <sup>12</sup> Te komo us-kon be-de Shir no senge bongon-de Shir Tato-o na. Wu wu muutu no hun-ne ye un wu, remen no bo'oste kum un ka cim-yo wua 'ye hun-ne ye un wu, ye ro ur-she'et m-cecas à. <sup>13</sup> Shir ruutu na un kom-to un ko-Gwomo-wu un ya-ut-kot, be-de un she'et-de o-comb. M-moka wu rwo'og Wa un wu Yeso wu wu ro m-was deen à, wu nom gwomo-ut na. <sup>14</sup> Remen Wa un wu, wu hokste nom un yo wu nome à. Kaane Shir rumsu na un kom-to un ko-Gwomo-wu un ya-ut-kot, wu sokste ba'as-ut na.<sup>‡</sup>

<sup>†</sup> Bor-o gaan:7 1:7 Hyen komo: Koro 4:12; Pmqn 23. <sup>‡</sup> Bor-o gaan:14 1:14 Hyen komo: Apis 1:7.

*Kiristi jiishe*

<sup>15</sup> Yatt-wu r̄o m-hyan un Shir á, amba da-o Wà un wu barme net à, wu kutute hun-ne Shir. Wu r̄o un gwomo-to un koyan yo Shir nome à. <sup>16</sup> Un bu-yo ka Wà-wu, Shir nome koyan yo r̄o n-Ton komo o-dak ne à, myet yo a m-hyan ne komo un yo a m-hyane ne á. Mosse un wu ne a nome hun-ne ye r̄o ut-gwomo à. Yagunte yan-tom-ye Shir un to ken kukt-to ne. Komo koyan un cow-yo un wu a nomte yo, remen koyan yo ye'et wu m-sek. <sup>17</sup> Wà-wu Shir ro kon cin ba a un nom ko yo ke rii-yo, komo un wu ne ko yo ke rii-yo neke kang-o gaan. <sup>18</sup> Komo wu, Kiristi, wu r̄o un gwomo-to un hun-ne ye un wu. Komo wu r̄o ye m'er. Bo hi-ur r̄o un gwomo-to o-wur à, wu wu r̄o takan-de un hoog pu-o remen hun-ne ye un wu. Wu wu Shir takne m'yons da-o wu mare à, komo wua do m-mar á. Remen wu r̄o ur-takan un koyan. § <sup>19</sup> Remen Shir ye zongse unze ko de Kiristi waragte net à, wu r̄o hond hond un Shir ne un ko yo ke bu-yo. <sup>20</sup> Komo Kiristi wu Shir nomte cow-yo m-munte un koyan yo wu nome à, be-de m-hongse un wu ne. Yo ka mossute myet-mo un rii-yo r̄o n-Ton à un hono o-dak ne. Shir nomog o-cow remen ko yo ke rii-yo ma'aste ba ut-ween un wu ne. Shir nomog yo ka un bu-yo un ya'as un Wà un wu, a wuuste hyó-mo un wu, wu meret n-ton o-kan.\*

<sup>21</sup> N-ga no ya-o-Korosiya, no ro nomog m-pupa un Shir ne. Barag-us no rwo'og no waragte yan-yage-to Shir, komo no ro m-nom un rii yo-yo. <sup>22</sup> Amba m-moka, Shir hongsite she'et-ur so-de be-ur no un wu ne. Wà un wu waragte net komo wu mer n-ton o-kan. Shir hongsite no bo wu yage Kiristi meret rem no à. Wu un nom kaane

§ B̄or-o gaan:18 1:18 Hyen komo: Apis 1:22-23.  
Hyen komo: Apis 2:16.

\* B̄or-o gaan:20 1:20

## Korosiya-ne ur-ba'as<sup>4</sup>Korosiya-ne Bor-o gaan:29

remen da-o nō he m-es un co-o Shir à wua goks nō hun-ne ye ba m-kukop ba ur-ba'as. Komo yatt-wu he m-zee nō nomog rii yo-yo á. <sup>23</sup> Nip-o urege nō ma'aste m-sher be-de un Ma-to m-Rerem. Se nō shereg ur-beeb ne untun hur-o a ma'e n-ton un shi'it-de m-'wons à. Taase nō yage ko wu ke net-wu wen nō hwo o-dish un rii-yo Shir swore o-nu un Ma-to m-Rerem to un wu à. Nō be'esute nō hogussute ka ma-to. A russute hun-ne ka Ma-to m-Rerem to hono o-dak kap. Komo me Burus un hi un de wan-gaan wu be-de un guw-ne ye Shir ya m-ko'ot un ka ma-to.

### *Guw-m Burus be-de un yan-dor o Shir*

<sup>24</sup> M-moka, me o-zak remen koob-de me m-swō rem nō à. Un con-m re, men swoon ka koob-de. Kiristi conog um su ur-koob remen un wu remen um guut hun-ne ye un wu, yan-dor Yeso. <sup>25</sup> Me wan-gaan wu be-de un nome un Shir m-senge remen gwu-o yan-dor kap. Remen Shir un daag me, wu ya'astu me ka senge-mo remen um guut nō. Shir tomog me um yoosu nō ma-to un wu ut-shishe. <sup>26</sup> Shir wukute kà zonge-to n-ga, wu un nom kaane us-hak deen. Shir 'ya hun-ne us-nap á, amba m-moka upsusse yo ro be-de un hun-ne ye Shir. <sup>27</sup> Shir daagte m-kute hun-ne un wu zonge-to un wu. Ká zonge-to to ro wukute. Shir conog m-gu ka ye ba Yahuda-ne á. Wu conog unze Kiristi she'et un nō ne. Wu conog nō ships ká dish-o unze noa kum seps-mo un wu, mo wu swore o-nu à. Te m-rure un kowan kwum-o ro wukusse mosse seps-m Kiristi ne à.

<sup>28</sup> Te ko'ote un kowan wu dore Kiristi. Komo te un yoose un kowan un myet-o us-weer ne. Yo a cone be-de un yoos-ur te à yo ro, bo myet-mo un yan-dor ye un Kiristi he m-es shiishe da-o ye he m-es un co-o Shir à. <sup>29</sup> O rwo'e mette m-senge mar-m-mar. Komo um nomog bo un nom-m re

um nomot ka senge-mo be-de un rwo un 'wons-mo Kiristi ya'u me à.

## B̄or-us yoor

<sup>1</sup> Um conog no nep gon mar-mo m-senge mo um rotte remen um guut no à, hun-ne ye o-Korosiya un ye un bo-o o-Rawudikiya ne, komo un ye ken yan-dor ye ne ye wete me m-hyan á. <sup>2</sup> Me m-nom un yo ka remen um dooté kukt-o no jaab-o ut-men, komo remen was-m or no ne dootú no gam-o ur-hi. Un kaane no he kum un caari-o o-zak o-nip ne o hun-ne rotte ye nape Ma-to Shir à, remen no nept tom-o Shir wuke à, wata, Kiristi un hi un de un wu. <sup>3</sup> Kiristi, wu wu cot he no m-gu no waragte ya-us-weer no nept ka tom-o ur-bon to, to Shir rwunte m-moka cas to ro untun kashi o-kwum à. <sup>4</sup> Me no m-rure un yo ka taase wu ken wu raks no un rerem-mo o-nu. <sup>5</sup> Ko de nomte me un hi un de me kane mosse un no ne á, amba hur un de ro mosse un no ne. Me o-zak deen bo um hoge no eks cak à, komo un gam-o ur-hi ne. Komo no shereg be-ur Kiristi.

### *Dor Wan-Koyan hantute hoog-m pu-mo*

<sup>6</sup> No gokste ka tom-o unze Kiristi Yeso wu ro Wan-Koyan no. M-moka sengu no nom un yo wu cone no nom à, ko o ke da-o cinda no gemte ur-hi be-de un wu à. <sup>7</sup> Sher no geer-us no n-me un Kiristi, komo no senge m-do be-de un nap-se un wu. Komo sengu no m-sher ur-beeb ne be-de un yo hun-ne yoosu no à mosse un Kiristi ne à. Komo no senge bongon-de Shir.

<sup>8</sup> Nom no ceen! Taase wu ken wu raks no, no dore bu-yo un wu á. Yo ye ro m-yoos à, a nom sa o zee o-nip, amba bo-to komo rii-yo o-hwaa. Ka yoos-de un tor temb un yo

hun-ne c̄owonte à. Ye r̄o m-yoose un hun-ne, unze ye m-d̄ore un jor-se ma-hun komo beeb-de kukt-ut yo-to, un s̄uge-de un yoose un hun-ne mosse un Kiristi ne.

<sup>9</sup> K̄o de nomte Kiristi barmute wu warag untun hun-ne à, wu Shir wu jip. <sup>10</sup> Komo a mossute n̄o un Kiristi, remen kaane n̄o r̄o un koyan ne, yo n̄o cone à yo o-Kukt. Wu wu r̄o un gwomo-to un koyan yo r̄o ut-gwomo à. <sup>11</sup> Remen n̄o gamag ur-hi be-ur Kiristi, ya n̄o r̄o untun ye a nome ur-ko à. Me un zee kaane remen Kiristi doste ba'as-ut n̄o. Ba ko-de o-wur de á, amba ko-de Kiristi r̄o m-nom à. <sup>12</sup> Da-o a yo'osu n̄o m-ho à, kutute na unze a jok she'et-de un ba'as-ut n̄o bo a joke Kiristi à. A 'yonstu n̄o bo a 'yonse Kiristi un hoog-m pu-mo à. Yo ka un nome remen n̄o shereg unze Shir ye 'yonse Kiristi un hoog, wu r̄o komo un gwomo-to un nom un kaane ne.\*

<sup>13</sup> N̄o ye r̄o Yahuda-ne á, a ro wongsutu n̄o un Shir ne remen n̄o jekt karamsa-o Shir. N̄o jekt karamsa-o Shir, komo remen Shir possutu n̄o be-de un beeb-de ut-ba'as á. Myet un kaane ne Shir 'yonstu n̄o un hoog-m pu-mo ne un Kiristi, Shir soksutu na ba'as-ut na kap.† <sup>14</sup> Shir un nom yo ka da-o wu sokse ka takurda-o a gente ba'as-ut na kap à. Shir doste ka takurda-o a gente ba'as-ut na à da-o a kame Kiristi n-ton o-kan har wu mer à.‡ <sup>15</sup> Ba ba'as-ut na Shir sokse cot á amba komo wu jeste gwomo-to un ko-caari-wu un gwomo-to ut-kukt yo-to. Wu kutute kowan cas cas unze wu reeg ye ur-gun un bu-yo Kiristi merte n-ton o-kan à.

*Dore ut-karamsa o bo'os á*

<sup>16</sup> N̄o rege net ut-to á, urege wu piishitu n̄o ut-ma to un: Rii-yo n̄o m-re,

---

\* B̄or-̄us yoor:12 2:12 Hyen komo: Roma 6:4. † B̄or-̄us yoor:13 2:13 Hyen komo: Apis 2:1-5. ‡ B̄or-̄us yoor:14 2:14 Hyen komo: Apis 2:15.

Korosiya-ne Ho-de ur-Wuwe7Korosiya-ne Bor-us yoor:23

Rii-yo nō m-swo,  
Ho-to nō nom ut-biki á,  
Ko ne nom o-zak un reng-o pu-yo, un  
Ho-de ur-Wuwe ne á. §

<sup>17</sup> Nō rege ye ut-to á, remen ká karamsa-to kap horomte-o. Remen karamsa-to to horomte-o un rii-yo ur-bon yo o-nip yo rwoone à. Komo Kiristi un hi un de un wu ro ka nip-o. <sup>18</sup> Remen kaane nō yage yan-gwegwer-mo ur-hi mo ut-bo, un yan-kwukte un yan-tom-ye Shir ne gaktu nō nom bo ye ro m-nom á. Nō dore yoos-de un ye nō he de kumu un yar-mo Shir essu nō á. Gon ka hun-ne ye ro m-zee ye jiište kowan un nap un Shir remen ye hyanag ut-hyangan. Weer-se un wu kap se un hur-de un wu se, komo se ro wu m-rwo us-ses. Amba o-nip wu rott cow-yo un nom us-ses á. <sup>19</sup> Wu yagusute dor-o un yoos-de o-nip mosse un Kiristi ne, wu ro hi-de o-wur à. Bo hi-ur ro m-kute o-wur o-cow à, kaane Kiristi ro m-kute un hun-ne ye un wu o-cow, remen ye gemet ur-hi be-ur gaan bo rwo-us ro m-bop o-wur à. Komo o bo'ose bo Shir cone à.\*

### *Hoog-m pu-mo n-me un Wan-Koyan*

<sup>20</sup> Bo rem-se ma-hun nō merse n-me un Kiristi à, m-moka beeb-de un hono o-dak, a garamse nō á. ¿Remen yan o notte un nome un ka karamsa-to o-dorotte sa o zee hono o-dak o ro nō m-garamse? <sup>21</sup> Ka ye ro nō m-yoose un ka karamsa-to à, ro nō m-zee, “Wō jar o-jar o ci gon ka rii-yo á! Wō jar o-jar o rek gon ka rii-yo m-re yo á! Wō jar o-jar o bup gon ka rii-yo á!” <sup>22</sup> Gon ka karamsa-to ro untun rem-se ro m-gos á. A komse un to ne a argu to m-jore. Nom mo un net-mo, mo un rwuun un yoos-de un net. Nō nome gon ka rem-se o-dorotte á. <sup>23</sup> Un yish-ye un

§ Bor-us yoor:16 2:16 Hyen komo: Roma 14:1-6.  
Hyen komo: Apis 4:16.

\* Bor-us yoor:19 2:19

hun-ne, gōn ka karamsa-to rō un sha-mō us-nap ne, to rō m-hante m-senge deen un gwugwer-mō ur-hi ne a kutute hun-ne unze ye torog be-de Shir. Har ye rō un reese un wur-to un ye ur-koob. Ye rō m-zee kō Shir a hoge o-zak. Amba o-nip ka karamsa-to rott de ken beeb-de to hette gu un hun-ne ye garamsute wur-to un ye á.

## Bor-us tet

### *She'et-de un ba m-kukop*

<sup>1</sup> Remen Shir ya'ag nō hoog-m pu-mō sa o zee a un 'yons nō un Kiristi ne à, remen kaane sengu nō hoob un ka rii-yo rō n-Tōn shir à. Tu nō yish be-de Kiristi rō tara à be-de jiishe m-sekemse à un kom-o ur-re de Shir.\* <sup>2</sup> Remen kaane, sengu nō barag-se un rem-se rō n-Tōn shir à. Nō nom barag-se un ka rem-us yo-se se un kàne un o-dak á. <sup>3</sup> Nō nom barag-se un ka rem-se un hono o-dak se á, remen nō mereste un se, hoog-m nō m-mōka mō rō wukusse be-ur Kiristi be-de Shir. <sup>4</sup> Da-o Kiristi, wu ya'u nō hoog à, wu muune un ka da-o, noa es un wu ne nō kum seps-mō un wu.

<sup>5</sup> Remen kaane yagu nō nom un rem-se ba ur-bon, se mosse un she'et-de ma-hun ne à. Nō nom rem-se o-ás á, kō ne she'et-de un yish o-yoor á. Taase nō nom suub-o un morogse us-rem un gop-de un rem-us yo-se ne. Nō nome kaane, nō waragte o ka kwukte un ka rem-se. <sup>6</sup> Remen hun-ne ye rō m-nom un ka rem-us yo-se se à, Shir a 'ye ye ur-koob deen remen koob-de o-dorotte. <sup>7</sup> Gōn ka rem-se nō ro m-nom n-ga da-o nō ro ur-she'et un bu-yo ma-hun à. <sup>8</sup> Amba m-mōka taase nō nom gōn ka rem-se komo á. Taase nō nom us-ryaab á. Yagu nō naas un hun-ne ut-men un gōn rii-yo nō m-nom kō m-zee à. Taase nō rwuunte

\* Bor-us tet:1 3:1 Hyen komo: Bong 110:1.



gom-ut yo-to. <sup>9</sup> Tomso ne, n̄o yage nome un or n̄o ne ut-b̄o cinda n̄o yagusute 'wutum-to un rii-to n̄o ro m-nom à. Nom n̄o kaane remen n̄o kus b̄o n̄o ro n-ga cin ba n̄o un gokste Kiristi á.† <sup>10</sup> Shir muutu n̄o hun-ne pu-ye komo wu r̄o n̄o m-jamas remen n̄o waragté untun wu, remen n̄o nept wu o-nip.‡ <sup>11</sup> Remen Shir muutu n̄o hun-ne pu-ye m-moka koos-m m̄o kus á. Un ko-Yahuda, un wu r̄o ko-Yahuda á, myet gaan-to. K̄o a koog net, k̄o a k̄o wu á, myet gaan-to. Koos-m m̄o kus á, k̄o ko-hamat k̄o ko-yan-ba-̄us-weer ne, k̄o ne ko-guw, k̄o ne wu r̄o ko-guw á. Kiristi wu jiishe koyan, wu wu r̄o tomso ne n-me un hun-ne ye un wu myet.

<sup>12</sup> Shir daagu n̄o remen n̄o waragté kashi hun-ne ye un wu remen wu r̄o n̄o m-was. Remen kaane sengu n̄o hoge 'won-ur or n̄o ne, n̄o un 'ya m-yar, n̄o nom gwugwer-mo ur-hi, n̄o zee se ye ken ye nomog rii-yo n̄o cone á. Hongsu n̄o b̄o depe à n̄o dungune. <sup>13</sup> 'Mo n̄o ur-hur un ba'as-ut or n̄o ne. Urege wu ken wu n-me n̄o nomote wu ken wu ur-ba'as, n̄o sokse wu. Hyange b̄o Wan-Koyan soksu n̄o ba'as-ut n̄o à, kaane tomso n̄o he sokse un or n̄o ne. §\* <sup>14</sup> Yo arge yo ka ma à, was n̄o or n̄o ne. Remen n̄o wasse or n̄o ne, noa she'et n̄o gem ur-hi be-ur gaan.

<sup>15</sup> Yage she'et-de un ba ut-ween de Kiristi yoosu n̄o à, de doruttu n̄o b̄o n̄o cone à. Nom n̄o yo ka remen Shir daagu n̄o, n̄o she'ete n̄o nom m-senge be-ur gaan ba ut-ween untun wur-o gaan. N̄o senge bongon-de Shir un k̄o o ke da-o. <sup>16</sup> Yage ma-ut Kiristi to she'ete n-me un hur-ut n̄o k̄o o ke da-o, to reet hi-de un yo n̄o m-nom à un yo n̄o us-barag ne à. Nom n̄o yo ka be-de un yoose un or n̄o ne us-weer ne, n̄o un or n̄o ne myet ut-ma weer-us-weer.

† B̄or-̄us tet:9 3:9 Hyen komo: Apis 4:22. ‡ B̄or-̄us tet:10 3:10 Hyen komo: Apis 4:24; Taka 1:26. § B̄or-̄us tet:13 3:12-13 Hyen komo: Apis 4:2.

\* B̄or-̄us tet:13 3:13 Hyen komo: Apis 4:32.

Tomso ne, no un hu un Sep-to ur-Bongon to Shir, komo no hu'e ut-sep, ut-dum ne to mosse Kiristi remen no kutu'e Shir unze hur-ut no ya'ase wu ur-bongon. <sup>17</sup> Myet bo un rii-yo no m-zee un yo no m-nom ne à, nom no yo n-me un jin-ur Wan-Koyan Yeso. No senge bongon-de Shir o-Tato un bu-yo un Wan-Koyan Yeso.†

*Kashi-ur she'et-de un yan-dor Yeso*

<sup>18</sup> No ne'a-ne ye ut-ge, nome no campo no ne o-dorotte, remen yo yo depe yan-dor-ye un Wan-Koyan ye nom.‡

<sup>19</sup> No campo-ne, no was un ne'a no ne. Was no ye no kutu ye ut-gagar á.§

<sup>20</sup> No yakar, nome no inu no un tat-ne no ne o-dorotte un ko yo ke rii-yo no m-nom à. Remen kaane Wan-Koyan cone no nom.\*

<sup>21</sup> No tat-ne, no su'e yakar no á, un ko yo ke rii rek-yo yo ye nome yo ba ur-bon á, taasü ye ruut ur-hur be-ur no. No nome ye kaane yea nom us-ryaab ye yage nom un yo depe à.†

<sup>22</sup> No guw-ne, no nom o-dorotte o un yan-hur-ut no ye un hono o-dak, un ko yo ke rii-yo yo no m-nom à. Taase no nom senge-mo un hyan-o un yish, untun yan-hoob-o ur-jin be-de un hun-ne, un suge-de un kaane nom no senge-m no hur-ur gaan, remen no m-'ya un Wan-Koyan m-sek.

<sup>23</sup> Myet-mo un rii-yo no m-nom à, nom no yo zak-o-zak un hur-ut no, untun ye ro m-nome un Wan-Koyan m-senge à. Ba ye ro m-senge remen net á. <sup>24</sup> Nom no kaane, no nep ha unze Wan-Koyan Yeso a top no. Remen kaane, nom no senge-m no ur-bon ne. Wuá 'ye no rem-se ur-bon se wu

† Bor-us tet:17 3:16-17 Hyen komo: Apis 5:19-20. ‡ Bor-us tet:18 3:18

Hyen komo: Apis 5:22; 1Bit 3:1. § Bor-us tet:19 3:19 Hyen komo: Apis 5:25;

1Bit 3:7. \* Bor-us tet:20 3:20 Hyen komo: Apis 6:1. † Bor-us tet:21 3:21

Hyen komo: Apis 6:4.

esse hun-ne ye un wu à. Baks nō unze Kiristi wu rō Wan-Koyan nō wu nō m-nome m-guw à. <sup>25</sup> Urege wu ken wu be-ur nō rō un nom un rii-yo ba ur-bon, Shir a 'ye wu ur-koob bō wu cone à. Remen koos-mō ur-hi rō kon be-de Shir á. †§

## Bor-us nass

<sup>1</sup> Nō ya-ut-hur, bop nō guw nō ne ur-bon ne. Nō nomo ye rii-yo depe à. Baks nō, nō ma nō un nome un Wa-o-Hur m-guw n-Ton shir.\*

### *Se ken karamsa se*

<sup>2</sup> Sengu nō us-kon be-de Shir koyanda. Da-o nō us-kon à, sengu nō ur-'er ur-bongon ne. <sup>3</sup> Nō baks te tomso ne da-o nō ro us-kon. Kon nō unze Shir tekse te cow-yo un ko'ot un ma-to un wu à, remen te ko'otuté hun-ne ka ma-to mosse un Kiristi ne, ka ma-to to Shir wuke n-ga à. Remen um ko'otte ka ma-to o rwo'e mette ke'o. <sup>4</sup> Kon nō rem re, bō um he m-senge m-ko'ot un ka Ma-to m-Rerem to cas cas à, bō depe um nom à. <sup>5</sup> Da-o nō ro mosse un hun-ne ne ye shere be-ur Yeso á, rwo nō us-weer be-de un rii-yo nō he m-nom à. Nō nom yo bō nō he hoks m-nom à un da-o nō kume à. † <sup>6</sup> Nomo nō ye ut-ma gwerger, remen ye hoguté rerem-mō un regen nō ut-to un yo nō m-zee à. Da-o nō m-rwor à, nom nō ceen remen nō nept bō depe nō shes wu à weer-us-weer.

### *Gas-de ur-kom*

---

‡ Bor-us tet:25 3:22-25 Hyen komo: Apis 6:5-8. § Bor-us tet:25 3:25  
 Hyen komo: Kara 10:17; Apis 6:9. \* Bor-us nass:1 4:1 Hyen komo: Apis 6:9.  
 † Bor-us nass:5 4:5 Hyen komo: Apis 5:16.

Korosiya-ne B̄or-us nass:7 12 Korosiya-ne B̄or-us nass:14

<sup>7</sup> Tikokos a ruru n̄o yo koru m̄e kan̄e à. Wu or na wu ko-yan-dor-wu m̄e m-was un wu n̄e deen à. Wu ko-yan-ess ut-ma be-ur Wan-Koyan komo wu r̄o m-nome un Wan-Koyan m-guw mosse un m̄e ne. ‡ <sup>8</sup> Yo rwo'e, um tombute wu be-ur n̄o, wu hyen n̄o à, remen n̄o nept o b̄o t̄e r̄o à. Tomso ne, wu dootú n̄o jaab-o ut-men un sher-m n̄o. § <sup>9</sup> Wu robe mosse un Onesimus ne. Onesimus or na wu ko-yan-dor komo, ko-yan-ess ut-ma ko-yan-bo-o n̄o wu, t̄e m-was un wu n̄e. Yoor-mo un ye a ruru n̄o koyan yo koru t̄e kan̄e à.\*

<sup>10</sup> Aristarkus, wu r̄o mosse un m̄e ne kan̄e ke'o à, wu zeeg um gas n̄o. Kaane komo Markus wu r̄o heno † Barnabas à wu ma wu zeeg um gas n̄o. (Um nomsutu n̄o ma-ut Markus remen kaane n̄o nepste yo m-nom, da-o wu wobe be-ur n̄o, goks n̄o wu kom-ut yoor.) ‡ <sup>11</sup> Yeso, wu a m-aag Justus à, r̄o n̄o m-gas eb un wu n̄e. Ka hun-ne tet-ye cot ye r̄o Yahuda-ne ye shere kan̄e à. Ye r̄o m-senge un m̄e ne ye rurut Ma-to m-Rerem mosse un gwomo-to Shir ne. Ye dootu m̄e jaab-o ut-men deen.

<sup>12</sup> Komo Epararas, ko-yan-bo-o n̄o r̄o n̄o m-gas. Wu ko-yan-guw-m Kiristi Yeso wu. Wu r̄o us-kon be-de Shir deen ko o ke da-o rem n̄o, untun net-wu wu r̄o ut-mur à. Wu r̄o us-kon b̄o n̄o he m-ha co n̄o es cak un beeb-de o-Kukt à, komo n̄o nom yo Shir cone n̄o nom à. § <sup>13</sup> Um hyenese hon un koob-de wu swo rem n̄o à, komo un yan-dor ne n-me un bo-to o-Rawudikiya, o-Hiriporis ne. <sup>14</sup> Ruka, ko-ya-us-baat, nay t̄e, wu t̄e m-was à, wu r̄o n̄o m-gas, kaane tomso

‡ B̄or-us nass:7 4:7 Hyen komo: Seng 20:4; 2Tim 4:12. § B̄or-us nass:8 4:7-8 Hyen komo: Apis 6:21-22. \* B̄or-us nass:9 4:9 Hyen komo: Pm̄on

† B̄or-us nass:10 4:10 Tato Markus ne un tato Barnabas ne, tato-o gaan mate ye. ‡ B̄or-us nass:10 4:10 Hyen komo: Seng 19:29; 27:2; Pm̄on

24; Seng 12:12,25; 13:13; 15:37-39. § B̄or-us nass:12 4:12 Hyen komo: Koro 1:7; Pm̄on 23.

ne Dimas.\* <sup>15</sup> N̄o gassu me myet-mo un or na ne yan-dor ye ro un bo-o o-Rawudikiya à. Gassu me n̄o ka ne'a-wu Nimpa mosse un hun-ne yan-dor ne ye ro m-morge un hur-o un wu à.

<sup>16</sup> A komsu n̄o karante un ka takurda-o um genbu n̄o à, n̄o heete hun-ne yan-dor ye ro o-Rawudikiya, remen ye karantuté o. N̄o tomso ne, n̄o karante takurda-o um gene yan-dor ye o-Rawudikiya à.

<sup>17</sup> Ruru n̄o Arkibus, “Kom ka senge-mo mo Wan-Koyan bobsu wo à.”†

<sup>18</sup> Me, Burus, me genbe ka gen-mo ur-buste mo un hi un de um gastu n̄o, remen n̄o nept unze me genbe ka takurda-o. Baks n̄o unze um ro ke'o, taase to-to ke n̄o unze n̄o kon Shir rem re. Yar-m Kiristi Yeso ro un n̄o ne!

---

\* B̄or-̄us nass:14 4:14 Hyen komo: 2Tim 4:11; Pm̄on 24; 2Tim 4:10; Pm̄on 24.

† B̄or-̄us nass:17 4:17 Hyen komo: Pm̄on 2.

## ut-Hun New Testament

Hun-Saare: ut-Hun New Testament New Testament

copyright © 2017 Wycliffe Bible Translators, Inc.

Language: Hun-Saare

Contributor: WBT Central Zone

© 2017 Wycliffe Bible Translators, Inc. in cooperation with the Ut-Hun Bible Translation Project All rights reserved. The New Testament in ut-Hun (Eastern Dukawa)

All rights reserved.

2020-11-17

---

PDF generated using Haiola and XeLaTeX on 14 Jun 2022 from source files dated 30 Nov 2021

4b40cd80-7cb8-5d3d-8563-557f030f99d7